

# BULETIN IKRAM KELANTAN EDISI SEMARAK RAMADAN



RAMADHAN 1436H/2015

UKHUWWAH TERAS KEGEMILANGAN

## PESANAN RASULULLAH BILA TIBA RAMADAN

Rasulullah telah berucap di hari-hari terakhir bulan Syaaban kepada sahabat-sahabat baginda:

Maksud Hadis: “ Wahai manusia ! Kamu akan dinaungi satu bulan yang agung, yang penuh keberkatan. Bulan yang terdapat di dalamnya satu hari yang lebih baik daripada seribu bulan. Bulan yang Allah telah jadikan berpuasa di dalamnya satu fardhu dan menghidupkan malamnya sebagai amalan sunnah.

Sesiapa yang menghampirkan dirinya kepada Allah menerusi amalan sunnah, dia seperti melaksanakan satu amalan fardhu selain amalan sunnah tersebut, dan sesiapa yang menunaikan satu amalan fardhu di dalamnya (bulan Ramadhan), dia seperti menunaikan 70 amalan fardhu selain amalan fardhu tersebut. Ia adalah bulan kesabaran dan kesabaran itu ganjarannya ialah syurga. Ia juga adalah bulan memberi pertolongan dan bantuan.

Ia bulan di mana rezeki orang-orang yang beriman bertambah. Sesiapa yang menyediakan makanan kepada seseorang yang berbuka puasa, tindakan itu akan mengampuni dosa-dosanya dan membebaskan dirinya daripada api neraka, bagi dirinya ganjaran seumpama pahala orang yang berpuasa tersebut tanpa sebarang pengurangan”

Sahabat-sahabat baginda langsung berkata: “Bukan semua kami memiliki sesuatu untuk dijadikan bahan berbuka seorang yang berpuasa”. Lalu Rasulullah s.a.w menjawab: “Allah akan mengurniakan ganjaran pahala seperti itu kepada seseorang yang menghidangkan untuk seseorang yang berpuasa berbuka walaupun sekadar seulas buah tamar, seteguk air atau seteguk air susu ....

Bulan Ramadhan adalah satu bulan yang awalnya adalah rahmah, pertengahannya adalah pengampunan dan hujungnya adalah pembebasan daripada api neraka. Sesiapa yang meringankan bebanan daripada hambanya, Allah lagi akan mengampuni dirinya serta membebaskannya daripada api neraka.

Perbanyakkanlah sepanjang (bulan Ramadhan) 4 kegiatan: 2 kegiatan yang akan menjadikan kamu diredai Allah s.w.t, 2 kegiatan lain pula kamu sendiri amat perlu kepadanya: Adapun 2 kegiatan yang akan menjadikan kamu diredai Allah, maka ia adalah ucapan syahadah: “ bahwa tiada tuhan melainkan Allah” dan kamu memohon keampunan daripadanya.

Adapun 2 kegiatan yang kamu sendiri amat perlu kepadanya, maka ia adalah: “ kamu memohon ( balasan ) syurga serta kamu meminta perlindungannya daripada api neraka. Sesiapa yang memberi minuman kepada seseorang yang berpuasa maka Allah akan memberinya minuman daripada kolah airku yang menjadikannya sama sekali tidak akan kehausan sehinggalah dia memasuki syurga” (Riwayat Ibnu Khuzaimah dalam kitab sahihnya)

## AMALAN PENGISIAN RAMADAN

Amal-amal sepanjang Ramadhan bagi memperoleh darjat taqwa:

1. Berpuasa dengan penuh kesabaran dan kesungguhan demi mengharap redho Allah Taala.
2. Membaca Al-Qur'an (Tilawah), memahami dan mengajarkannya.
3. Memberikan makanan berbuka kepada orang-orang yang berpuasa (Ith'amu ath-tha'am)
4. Memerhatikan kesihatan, terutama dalam bab tidak berlebihan-lebihan sewaktu berbuka.
5. Menjaga keharmonian keluarga.
6. Mengasah diri untuk berdakwah sama ada dengan menganjurkan majlis ilmu atau berpesan-pesan kepada kebaikan dan mencegah kepada kemungkaran.
7. Solat Tarawikh (Qiyamul Ramadhan).
8. Beri'tikaf di masjid.
9. Sentiasa memperbaharui taubat.
10. Mengerjakan Umrah di bulan mulia ini.
11. Membayar Zakat Fitrah.
12. Menjaga hubungan dengan manusia dengan mengeratkan sillaturrahim.
13. Sentiasa mengerjakan qiamullail, solat sepertiga malam dengan mengerjakan solat tahajjud, solat sunat taubat, solat sunat hajat dan solat witr.

## Remaja Berakhlak Di bawah Panji-Panji Nabi Yusuf as



### Secara jelas...

Masa remaja adalah zaman yang penuh dengan cabaran.

### Dan kamu wahai adik remaja...

Menghadapi dugaan hidup di tengah-tengah masyarakat yang tidak melaksanakan hukum dan cara hidup berlandaskan Islam.

### Bahkan bukan itu sahaja...

Di sekelilingmu mudah sahaja budaya barat bersalut dengan kekufuran dan kemaksiatan.

### Lalu apakah alasanmu wahai adik remaja...

Sukarnya menjadi seorang remaja mukmin dan berakhlak mulia.

### Tetapi, kamu harus ingat sesuatu...

Bukankah Allah Taala amat mencintai remaja yang cinta dan dekat petunjuk hidayah-Nya?

### Allah Taala meletakkan kamu dalam....

Kumpulan pemuda-pemuda berakhlak mulia di akhirat sana. Nabi Yusuf as terpilih menjadi ketua para belia yang baik budi pekerti. Baginda as adalah seorang Nabi yang sangat kakak dan tampan.

### Jika kamu berasa berat dugaan sebagai remaja...

Bahkan Nabi Yusuf lebih berat ujiannya di waktu muda. Diuji dengan dibuang oleh saudara-saudaranya di perigi. Dijual sebagai hamba, digoda majikan untuk melakukan zina dan dipenjarakan atas sesuatu yang bukan menjadi kesalahannya.

### Bukankah Rasulullah SAW juga menyayangi kamu wahai adik?...

"Aku berpesan kepadamu supaya berbuat baik kepada golongan pemuda, sesungguhnya hati mereka paling lembut. Sesungguhnya Allah telah mengutusku membawa agama Hanif ini, lalu para pemuda bergabung denganku dan orang-orang tua menentangku" [Riwayat Bukhari].

## KEINDAHAN BERSAMAMU ALQURAN



Antara latihan praktikal dalam bulan Syaaban sebagai persediaan untuk bulan Ramadhan ialah membaca Al-Quran. Anas bin Malik mengatakan:

*"Apabila masuk bulan Syaaban, orang-orang Islam menilik mushaf-mushaf dan membacanya serta mengeluarkan zakat harta mereka, tujuannya ialah menguatkan bagi mereka yang lemah dan miskin untuk berpuasa bulan Ramadhan"*

Seorang ahli salaf berkata: *"Syaaban ialah bulan bagi pembaca Al-Quran"*

Ramadhan ialah bulan diturunkan padanya Al-Quran, maka sesiapa yang membiasakan memelihara bacaan Al-Quran sebelum masuknya bulan Ramadhan, maka dia akan memeliharanya dalam bulan Ramadhan.

Seorang soleh ditanya mengenai seorang muslim yang mula membaca Al-Quran selepas lama ia tidak membacanya, maka dia berasa berat untuk membacanya sehingga hampir-hampir dia tidak berjaya menghabiskan beberapa potong ayat daripadanya.

Ia menjawab: *"Dia mestilah mengatasi perasaan itu"* Orang yang bertanya tadi terus berlalu pergi kemudian dia datang semula dan berkata: *"Hairan sungguh, setelah aku membaca setengah juzuk Al-Quran, aku berterusan minat untuk membacanya, tetapi perasaan itu masih tidak aku biasakan"*

Maka lelaki yang soleh itu berkata: *"Inilah keadaan Al-Quran terhadap orang yang lalai"*.

Sesungguhnya Al-Quran sebenarnya adalah ubat bagi penyakit hati. Menjauhinya akan menyebabkan hati dipenuhi dengan karat dan selaput.

Oleh itu ayat-ayat yang dibaca semula itu akan menyucikan semula hati itu. Ini adalah usaha yang susah dan tidak disenangi oleh nafsu.

Apabila kita melawan keengganan nafsu itu, Al-Quran akan menjalankan tugasnya sehingga hati itu akan suci semula dan menjadi tempat yang sesuai untuk menerima cahaya Al-Quran. Dengan itu, jadilah ia seorang mukmin itu seperti mana disebutkan dalam firman Allah SWT yang bermaksud

:  
*"Dan apabila dibacakan kepada mereka ayat-ayat Allah maka akan bertambah iman mereka" (Al-Anfal:2).*

Oleh itu, membaca Al-Quran dalam bulan Syaaban akan menerangkan hati daripada karat bulan-bulan sebelumnya sehinggalah bersinar dan ia menjadi tempat yang baik untuk menerima kesan Al-Quran yang terdiri dari hidayah, taufiq dan cahaya bulan Ramadhan